

Hubungan Interpersonal Golongan ‘Pengkid’ di Malaysia

(Interpersonal Relationships of “Pengkid” in Malaysia)

ZHOORIYATI SEHU MOHD & INTAN HASHIMAH MOHD HASHIM

Pusat Pengajian Sains Kemasyarakatan
Universiti Sains Malaysia
E-mel: yati_2386@yahoo.com

Abstrak

Kajian ini berfokus kepada golongan ‘Pengkid’ iaitu satu istilah atau bahasa slanga yang digunakan di Malaysia untuk merujuk kepada lesbian dari kategori butch. Orientasi seksual mereka ialah tertarik kepada sesama jantina. Kajian ini dijalankan untuk meneroka hubungan interpersonal golongan minoriti ini. Untuk mendapatkan maklumat yang mendalam dan menyeluruh, temubual semi struktur telah dijalankan terhadap 25 orang peserta kajian dari golongan pengkid dari sekitar Pulau Pinang, Kuala Lumpur, dan Selangor. Pelbagai teknik telah digunakan untuk mendapatkan peserta kajian ini termasuk melalui laman rasmi Pengkid Malaysia dan kaedah bola salji (“snowball”). Hasil penelitian kajian ini mendapati golongan pengkid mempunyai hubungan interpersonal yang luas dan pelbagai serta menerima pelbagai bentuk sokongan sosial yang berbeza dari hubungan tersebut. Perkara ini menunjukkan bahawa golongan pengkid diterima dalam lingkungan sosial mereka dan mempunyai kualiti hubungan yang baik dengan individu-individu yang mengenali dan mengetahui pilihan orientasi seksual mereka. Teman rapat dan teman istimewa merupakan individu utama yang memberikan hampir kesemua bentuk sokongan kepada golongan ini. Walau bagaimanapun dapatan kajian menunjukkan bentuk hubungan interpersonal yang lain turut memberikan sokongan sosial yang diperlukan oleh golongan ini tetapi dalam kualiti dan kuantiti yang lebih rendah berbanding sokongan yang diterima daripada dua bentuk hubungan itu. Dapatan kajian menunjukkan peranan berbeza dan unik yang dimainkan oleh ahli dalam rangkaian sosial golongan ini. Kajian menyumbang kepada kekurangan penyelidikan yang berfokus kepada orientasi seksual berhubung kepada kumpulan ini.

Kata kunci: “Pengkid”, lesbian, hubungan interpersonal, sokongan sosial.

Abstract

This research focuses on Pengkid. Pengkid is a term or a slang used in Malaysia to refer to lesbians in the butch category. They are a group of individuals who practices same sex sexual orientation, in which they are sexually attracted to women. This research was conducted to examine interpersonal relationships of Pengkid and their satisfaction over these relationships. To gain a deeper and more comprehensive picture, a semi-structural interview was conducted with 25 Pengkid participants from around Pulau Pinang, Kuala Lumpur, and Selangor. Participants were recruited using various methods including from Malaysian Pengkid official website and through snowballing technique. Results show that Pengkids in this study have wide and various categories of interpersonal relationships and received several types of social supports from their interpersonal relationships. This indicates that Pengkid in this study were well-accepted by their social circle and maintained a good relationship with individuals who knew and are aware of their sexual orientation. Close friends and romantic partners were the main sources of all types of support for this group. Other categories of interpersonal relationships also provide some social supports to this group but of lesser quality and quantity compared to these two. Findings from this research suggest the unique and different role is played by different individuals in one social network. This study contributes to the same sex sexual orientation on this particular group.

Keywords: “Pengkid”, lesbian, interpersonal relationship, social support.

Pengenalan

Secara umumnya, golongan pengkid merupakan golongan minoriti yang masih belum banyak dikaji oleh penyelidik sosial. Mereka juga merupakan golongan minoriti yang mungkin dipandang serong dan kerap didiskriminasikan oleh individu sekeliling dalam pelbagai perkara kerana orientasi seksual mereka. Kesan diskriminasi ini berpotensi mewujudkan konflik, rasa kurang berpuas hati, marah, dan lain-lain perasaan negatif dalam diri mereka dan seterusnya merendahkan kualiti kehidupan mereka. Sebagai satu golongan minoriti yang mungkin menjadi mangsa diskriminasi dalam masyarakat, amatlah penting, kehidupan mereka dikaji dengan lebih mendalam dan menyeluruh. Selain itu, orientasi seksual yang bukan tradisional boleh memainkan peranan penting dalam mempengaruhi aspek kehidupan mereka terutamanya yang ada kaitan dengan hubungan interpersonal mereka. Kajian ini meneroka bentuk hubungan interpersonal golongan pengkid di Malaysia. Selain itu, kajian ini juga dapat membantu memperluaskan lagi kefahaman tentang hubungan interpersonal kepada individu yang mempunyai orientasi seksual terhadap sesama jantina.

Untuk mengenalpasti bentuk hubungan interpersonal mereka, kajian ini telah dijalankan terhadap 25 orang golongan pengkid di tiga buah negeri utama di Malaysia, iaitu Pulau Pinang, Kuala Lumpur, dan Selangor.

Lesbian merupakan satu sub-kategori utama di bawah kumpulan lesbian, *gay*, biseksual, dan transgender (LGBT) dan ia telah wujud sejak zaman kuno lagi. Istilah lesbian merujuk kepada kumpulan wanita yang tertarik secara seksual terhadap wanita lain. Manakala istilah *gay* pula merujuk kepada golongan lelaki yang terlibat dalam hubungan seksual dengan pasangan yang sama jantina (Baba, 1995). Seterusnya, biseksual adalah sedikit berbeza berbanding individu *gay* dan lesbian kerana golongan ini tertarik secara seksual dengan kedua-dua jantina, iaitu lelaki dan wanita (Bearss, 2010; Hyde & DeLamater, 2003). Istilah transeksual pula kadang-kala disamakan dengan konsep *gender dysphoria* iaitu merujuk kepada konflik diantara gender dan seks fizikal yang dimiliki (Noor, 2004). Walaupun golongan ini mempunyai ciri-ciri yang berbeza, namun mereka mempunyai persamaan dari segi pilihan orientasi seksual mereka iaitu mengamalkan orientasi seksual sesama jantina (Bearss, 2010).

Istilah lesbian secara spesifiknya merujuk kepada kumpulan wanita yang tertarik secara seksual terhadap wanita lain. Ia juga menekankan aktiviti seksual wanita lesbian dengan wanita lain di alam realiti atau fantasi mereka (Smith & Serovich, 2008). Menurut sorotan kajian, istilah lesbian berasal dari Pulau Lesbos, Greek yang dihuni oleh golongan wanita (Kartono, 1989) di mana pada sekitar 600 SM seorang penyair, Sappho, memuji dan menggalakkan wanita homoseksual melalui bait-bait puisinya (Bieber, 1969; Hyde & DeLamater, 2003). Selain itu, Sappho juga dalam puisi-puisinya bercerita mengenai kehidupan harian golongan wanita, hubungan, dan amalan mereka. Dia juga menumpukan kepada kecantikan wanita dan melafazkan cintanya terhadap wanita lain secara umum melalui puisi-puisi ciptaannya. Pada ketika itu, Sappho juga telah membina sekolah untuk perempuan (Ettorre, 1980) dan mengamalkan hubungan seks sesama perempuan di pulau tersebut (Kartono, 1989).

Hasil penulisan Bieber (1969) dalam kajiannya mendapati bahawa sejak zaman kanak-kanak lagi golongan lesbian mengamalkan gaya hidup yang berbeza berbanding kanak-kanak perempuan normal yang lain. Pada zaman kanak-kanak, golongan lesbian cenderung memilih permainan lelaki berbanding permainan kanak-kanak perempuan seperti anak patung. Selain itu, mereka juga lebih gemar bermain dengan kanak-kanak lelaki berbanding kanak-kanak perempuan. Pada masa yang sama, ketika kanak-kanak mereka juga cenderung memilih pakaian kanak-kanak lelaki berbanding pakaian kanak-kanak perempuan. Ketika usia remaja pula, golongan lesbian tidak mewujudkan aspirasi feminin normal seperti ingin berkahwin dan menjadi

ibu. Sebaliknya, pada peringkat usia ini mereka akan mula meminati wanita lain dan kebarangkalian besar akan menjalinkan hubungan romantik dengan mereka (Bieber, 1969).

Di Barat, sebahagian besar golongan lesbian mengkategorikan diri mereka samada sebagai “*butch*” atau “*femme*” (Bieber, 1969). Secara umumnya, istilah *butch* merujuk kepada lesbian yang bersifat kekelakuan atau maskulin dan mereka meniru gaya lelaki dari segi tingkah laku, percakapan, pakaian, dan sebagainya. Manakala istilah *femme* pula merujuk kepada lesbian yang bersifat kewanitaan atau feminin yang mempunyai sifat-sifat seperti bersikap malu, patuh, dan tidak melawan serta bersikap ayu dan lembut (Bieber, 1969; Rosario, Schrimshaw, Hunter, & Levy-Warren, 2009). Di negara Barat, golongan *butch* dan *femme* adalah berpasangan antara satu sama lain dan mereka dibenarkan tinggal bersama serta menjalankan kehidupan normal seperti golongan heteroseksual (Bieber, 1969).

Manakala “pengkid” pula merupakan istilah yang digunakan dalam kalangan masyarakat Malaysia untuk merujuk kepada golongan wanita lesbian yang berperwatakan lelaki. Golongan pengkid di Malaysia juga boleh dikaitkan dengan individu yang berambut pendek, berpakaian lelaki, menutup sifat-sifat kewanitaan seperti membengkung dada, dan tidak memakai pakaian wanita. Pada masa yang sama, mereka juga tertarik secara seksual terhadap golongan wanita lain. Dalam konteks perbincangan sebelum ini, pengkid bolehlah disamakan sebagai lesbian berkategori ‘*butch*’.

Dalam konteks kajian ini, golongan pengkid di Malaysia menjadi fokus kajian. Kajian ini meneliti kepada golongan ini dan melihat kepada bentuk hubungan interpersonal yang dimiliki oleh mereka. Walau bagaimanapun, kebanyakan kajian terkini berfokus kepada golongan lesbian secara umum dan bukan kepada pengkid atau ‘*butch*’ secara khusus. Oleh itu, kajian ini juga menjadikan bahan bacaan yang menggunakan istilah lesbian sebagai panduan.

Dalam buku tulisan Heider (1958), konteks hubungan interpersonal merujuk kepada hubungan antara beberapa individu, biasanya dua atau lebih dalam suatu hubungan dan ia merupakan aspek terpenting dalam kehidupan manusia. Fenomena yang diambil kira dalam hubungan interpersonal adalah pemikiran dan perasaan pada orang lain, cara melihat dan perkara yang dilakukan terhadap individu itu, perkara yang diharapkan daripada individu itu, dan juga tindakbalas terhadap orang lain. Semasa berhubung atau berkomunikasi dengan orang lain, individu itu tidak boleh dianggap sebagai objek tunggal dalam persekitaran. Tetapi individu itu perlu digambarkan atau dianggap sebagai suatu hubungan dan berhubungan dengan orang lain. Dalam konteks ini, hubungan interpersonal bolehlah dilihat mewakili

beberapa individu penting dalam kehidupan seseorang di mana seseorang ada berinteraksi secara personal, fizikal atau emosional dengan mereka ini. Hubungan interpersonal inilah yang menjadi fokus kajian ini.

Menurut tinjauan literatur, hubungan interpersonal golongan pengkid adalah pelbagai walaupun mereka mengamalkan orientasi seksual sesama jantina. Individu-individu yang terdapat dalam hubungan interpersonal golongan minoriti ini adalah seperti ahli keluarga, teman istimewa atau pasangan hidup, rakan sekerja, rakan sosial (*social acquaintance*), dan lain-lain hubungan (Grossman, D'Augelli, & Hershberger, 2000).

Dalam kalangan ahli hubungan interpersonal tersebut, teman rapat merupakan hubungan interpersonal yang paling banyak memberi sokongan kepada golongan ini (Grossman, D'Augelli, & Hershberger, 2000). Ia diikuti oleh teman istimewa atau pasangan, lain-lain hubungan, adik-beradik, rakan sosial, rakan sekerja, dan ibu bapa. Perkara ini jelas menunjukkan bahawa hubungan dengan teman rapat adalah sangat penting untuk golongan ini disebabkan penerimaan pelbagai bentuk sokongan daripada mereka. Manakala ibu bapa pula merupakan hubungan interpersonal paling akhir disenaraikan sebagai bentuk hubungan interpersonal yang penting dalam hidup mereka.

Golongan lesbian yang tergolong dalam kumpulan LGBT seharusnya mempunyai hubungan interpersonal yang luas dan positif kerana ia mampu mengatasi pengalaman negatif yang dialami disebabkan pilihan orientasi seksual mereka (Grossman et al., 2000). Pada masa yang sama, keadaan emosi dan kesihatan mereka juga akan berada pada tahap yang sihat apabila mempunyai sokongan sosial yang baik daripada hubungan tersebut. Kajian yang dijalankan oleh Beeler, Rawls, Herdt, dan Cohler (1999) menyimpulkan bahawa kualiti rangkaian sosial atau hubungan interpersonal merupakan antara perkara terpenting kepada kumpulan lesbian. Penyelidik dan ahli profesional dalam bidang kesihatan pula membuktikan bahawa golongan pengkid yang kurang mendapat sokongan daripada hubungan interpersonal, lazimnya akan berdepan dengan pelbagai masalah seperti mudah tersinggung, mendapat penyakit seperti kaduovaskular, mengalami tekanan, dan sebagainya (Grossman et al., 2000).

Golongan lesbian yang diterima oleh ahli keluarga setelah mengetahui pilihan orientasi seksual mereka yang sebenar, secara umumnya menerima pelbagai bentuk sokongan selain dapat mengatasi keadaan stres mereka dengan lebih baik (Diplacido, 1998). Hal ini menunjukkan bahawa hubungan dengan ahli keluarga mereka adalah baik walaupun identiti seksual sebenar mereka telah terdedah. Walau bagaimanapun untuk golongan lesbian yang mempunyai bentuk hubungan yang kurang baik dengan ahli keluarga mereka, mereka cenderung mengalami tahap stres yang membimbangkan (Diplacido, 1998).

Golongan lesbian yang tidak menerima sokongan yang diperlukan daripada ahli keluarga mereka, cenderung membina hubungan yang baik dengan rakan-rakan sealiran terutamanya untuk mendapatkan sokongan yang diperlukan dalam hidup mereka (Nardi, 1999). Apabila mereka bersama rakan-rakan, mereka berasa kebebasan melakukan sesuatu, rasa kepunyaan (*belonging*) dan rasa diterima (*acceptance*) disamping berasa selesa dan selamat (*comfort and secure*), serta berasa perkongsian (*sharing*). Hasil kajian menjelaskan bahawa perkara ini merupakan nilai-nilai yang dituntut oleh golongan remaja (Kassim & Zain, 1995) dalam hidup mereka. Memandangkan rakan-rakan memberikan sokongan yang diperlukan, maka ia menyebabkan hubungan dengan rakan-rakan menjadi hubungan yang sangat penting kepada golongan pengkid. Hal ini akan berterusan sehingga golongan ini meningkat usia terutama sekiranya mereka masih menerima sokongan yang kurang memuaskan daripada ahli keluarga (Grossman et al., 2000).

Selain daripada rakan-rakan, hubungan dengan teman istimewa atau pasangan hidup juga adalah antara hubungan interpersonal yang terpenting kepada golongan lesbian. Perkara ini disebabkan kerana sokongan emosi dan sosial yang diterima daripada hubungan interpersonal ini adalah penting dan sangat memuaskan mereka. Golongan pengkid yang disamakan dengan lesbian kategori *butch*, berpasangan atau menjalin hubungan romantik dengan wanita lain yang mengekalkan ciri-ciri seorang wanita asli (*femme*). Hasil penyelidikan ahli-ahli psikologi mendapati, golongan lesbian mempunyai tahap kepuasan yang maksimum dalam hubungan dengan pasangan mereka (Peplau & Cochran, 1990).

Hasil penelitian kajian yang dijalankan oleh Kurdek (2005) mendapati golongan lesbian menyelesaikan sesuatu konflik dengan lebih positif berbanding pasangan heteroseksual apabila wujud sesuatu masalah dalam hubungan. Biasanya golongan heteroseksual akan menyelesaikan sesuatu konflik berdasarkan emosi, tetapi pasangan lesbian pula akan menggunakan cara perbincangan yang positif dan akan mengekalkan nada positif itu sepanjang perbincangan dengan pasangan mereka. Secara ringkasnya, golongan lesbian meneruskan hubungan dengan pasangan mereka berdasarkan perbincangan bersama dan mengambil keputusan bersama-sama. Selain itu, mereka juga tidak mengamalkan cara hidup dengan membebankan pasangan tetapi menjalankan sesuatu tugas secara sama rata untuk mengelakkan pelbagai masalah dalam kehidupan sebagai pasangan. Situasi ini menyebabkan konflik tersebut dapat diselesaikan dengan baik dan menyebabkan hubungan mereka juga berkekalan lebih lama (Kurdek, 2005).

Kesimpulannya, golongan lesbian mempunyai bentuk hubungan interpersonal yang luas walaupun mereka mengamalkan orientasi seksual sesama jantina. Walau bagaimanapun, hubungan interpersonal dengan teman

rapat dan teman istimewa adalah bentuk hubungan yang amat penting kepada golongan lesbian. Secara umumnya, teman rapat merupakan hubungan interpersonal terpenting yang memberikan sokongan sosial utama kepada mereka (Beeler et al., 1999). Selain itu, hubungan interpersonal dengan teman istimewa juga memainkan peranan penting kepada golongan ini. Golongan ini juga menetapkan beberapa prinsip dalam hubungan seperti kesaksamaan dan didapati mendapat kepuasan yang maksimum dalam hubungan dan hubungan mereka juga berpanjangan (Kurdek, 2005).

Metodologi

Kajian ini berfokus kepada hubungan interpersonal 25 orang golongan pengkid di Malaysia. Walaupun kajian tentang hubungan interpersonal dalam kalangan golongan lesbian telah banyak dijalankan di negara Barat, namun kajian tentang golongan ini masih amat terhad di Malaysia. Maka, kajian ini memberi tumpuan kepada bentuk-bentuk hubungan interpersonal yang dimiliki, tahap kepuasan dalam hubungan tersebut, dan lain-lain maklumat berkaitan bentuk hubungan tersebut.

Kajian ini merupakan kajian berbentuk kualitatif yang menggunakan temubual semi struktur. Dalam kajian ini, temubual berbentuk semi struktur telah digunakan untuk mendapatkan maklumat daripada peserta. Temubual semi struktur adalah sesuai digunakan dalam kajian ini kerana ia menggunakan bentuk soalan terbuka untuk mendapatkan maklumat yang lebih mendalam daripada peserta kajian. Justeru, melalui temubual semi struktur ini penyelidik dapat mengumpul maklumat yang lebih mendalam daripada peserta kajian. Pendekatan semi struktur pula membantu temubual lebih berfokus kepada topik yang relevan dalam kajian ini.

Tiga buah negeri utama di Malaysia, iaitu di Pulau Pinang, Kuala Lumpur, dan Selangor telah menjadi tumpuan kajian ini. Ketiga-tiga negeri dipilih berdasarkan andaian bahawa kumpulan sasaran lebih tertumpu di kawasan-kawasan bandar besar. Manakala peserta kajian ialah seramai 25 orang yang beragama Islam dalam lingkungan umur 18 hingga 45 tahun dan mempunyai kriteria-kriteria seorang pengkid seperti yang ditetapkan dalam kajian ini. Peserta kajian ini terdiri daripada mereka yang beragama Islam sahaja kerana kajian tidak mendapat kerjasama daripada golongan pengkid yang bukan Islam.

Antara kriteria-kriteria seorang pengkid yang menjadi peserta kajian ini adalah secara biologinya adalah wanita, iaitu mempunyai alat sulit wanita (*vagina*), nama pada kad pengenalan adalah nama perempuan (binti atau anak

perempuan), dan cara pakaian adalah kearah kekelakuan iaitu sering memakai pakaian lelaki. Selain itu, peserta kajian juga mengikat (membengkung) payu dara dengan kain untuk mengelakkan menonjol dan kelihatan sebagai wanita lain, sering melibatkan diri dalam aktiviti yang dimonopoli oleh golongan lelaki seperti mendaki bukit dan sebagainya, serta tertarik dan mempunyai perasaan secara seksual terhadap golongan wanita berbanding menyukai lelaki. Setiap peserta yang menyertai kajian ini juga telah memenuhi kriteria yang ditetapkan.

Bilangan peserta kajian yang menyertai kajian ini dari ketiga-tiga negeri adalah berbeza iaitu lapan orang dari Pulau Pinang, tujuh orang dari Kuala Lumpur, dan 10 orang dari Selangor. Kesukaran untuk mendapat peserta dan keengganan mereka untuk menyertai kajian ini menyebabkan penyelidik sukar menetapkan bilangan peserta dari setiap negeri tersebut. Oleh itu, bilangan peserta di kajian ini adalah berbeza iaitu berdasarkan kemahuan peserta yang bersetuju untuk menyertai kajian ini.

Penyelidik menggunakan pelbagai bentuk teknik untuk mengumpul peserta kajian ini. Antaranya melalui teknik laman sosial *Facebook*, berkunjung ke pusat membeli-belah terkemuka, kedai makan 24 jam, dan pusat hiburan seperti panggung wayang dan pusat *snooker* yang menjadi tumpuan utama golongan pengkid. Selain itu, penyelidik juga telah menggunakan Laman Web Rasmi Pengkid Malaysia (<http://pub7.bravenet.com/guestbook/529352780>) untuk mendapatkan peserta kajian. Memandangkan kebanyakan teknik yang digunakan tidak memberikan hasil yang memuaskan, penyelidik menggunakan teknik *snowball* untuk mendapatkan peserta yang secukupnya. Setelah berjumpa dan menemui seorang peserta, mereka diminta untuk memperkenalkan rakan-rakan sehaluan kepada penyelidik. Langkah ini adalah sangat efektif kerana dapat mengumpul 11 orang peserta dan ia mencukupkan bilangan peserta yang diperlukan.

Temubual diadakan di pusat membeli-belah, kedai makan, dan taman rekreasi. Peserta kajian diberi kebebasan sepenuhnya untuk menetapkan masa dan tempat untuk ditemubual mengikut keselesaan mereka. Sebelum berjumpa dengan peserta, panggilan telefon telah dibuat untuk menetapkan temujanji mengikut kesesuaian masa mereka.

Semasa sesi temubual, dihadkan kepada seorang peserta sahaja pada satu masa dan setiap mereka terlibat dalam satu sesi temubual sahaja. Setiap peserta mengambil masa 40 minit hingga dua jam untuk menjawab kesemua soalan. Walau bagaimanapun, terdapat beberapa orang peserta yang kurang bercakap semasa sesi temubual dijalankan, maka, sesi tersebut dapat ditamatkan dalam masa yang sangat singkat dan begitu juga sebaliknya. Selain itu, temubual juga membolehkan penyelidik mengumpul data berdasarkan

skop yang telah ditetapkan. Semasa sesi temubual, kesemua jawapan yang diberikan oleh peserta kajian dicatatkan dalam kertas temubual.

Data yang dikumpul daripada 25 orang peserta kajian dianalisa dengan cara deskripsi, iaitu pemerhatian melalui jadual. Perkara ini mengambil pendekatan analisa isi berbentuk kuantitatif. Data-data setiap perkara yang dikumpul disenaraikan dalam bentuk jadual dan dilihat perbandingannya. Deskripsi kajian dibuat hasil pemerhatian terhadap respon yang tinggi kepada yang rendah bagi setiap soalan yang ditanyakan kepada peserta.

Temubual kajian ini dimulakan dengan bahagian demografi. Dalam bahagian ini, peserta kajian diminta untuk melaporkan maklumat latar belakang mereka untuk melakarkan profil diri mereka. Antara maklumat yang ditanyakan adalah seperti umur, agama, bangsa, taraf pendidikan, pekerjaan, tempoh bekerja, pendapatan sebulan, negeri asal, negeri tinggal sekarang, dan tempat tinggal.

Dalam bahagian hubungan interpersonal pula, peserta kajian ditanyakan dengan mendalam mengenai kekerapan berhubung, kualiti hubungan, perkongsian pelbagai perkara dengan individu tersebut, konflik, kepuasan dalam hubungan, cara perkenalan, kepentingan individu tersebut serta sokongan daripada setiap individu yang disenaraikan oleh penyelidik dalam soalan temubual itu.

Seramai 14 kategori individu telah disenaraikan sebagai langkah untuk memudahkan peserta kajian. Kategori ini digunakan untuk mendapat keseluruhan rangkaian sosial yang ada dalam hubungan rangkaian sosial yang dianggap penting sahaja. Individu-individu tersebut merangkumi ibu, bapa, adik-beradik paling rapat, adik-beradik paling tidak rapat, lain-lain ahli keluarga yang rapat, teman istimewa, teman rapat, teman sebilik atau serumah yang baik, teman sebilik atau serumah yang kurang baik, teman di tempat kerja atau belajar yang baik, teman di tempat kerja atau belajar yang kurang baik, pensyarah atau majikan, jiran, dan lain-lain individu yang baik dengan diri peserta kajian.

Dapatan Kajian

Demografi peserta kajian

Peserta kajian ini terdiri daripada 25 orang ($n=25$) individu yang menepati kriteria pengkid. Kesemua peserta kajian beragama Islam dan berbangsa Melayu dari tiga buah negeri di Malaysia, iaitu Pulau Pinang ($n=8$), Kuala Lumpur ($n=7$), dan Selangor ($n=10$).

Latar belakang umur peserta kajian adalah terdiri daripada 19-23 tahun ($n=11$), 24-28 tahun ($n=8$), 29-33 tahun ($n=2$), 34-38 tahun ($n=3$), dan 39-43 tahun ($n=1$). Manakala tahap pendidikan mereka pula terdiri daripada sekolah menengah ($n=2$), Sijil Pengajian Malaysia ($n=11$), Sijil Tinggi Pelajaran Malaysia ($n=1$), sijil ($n=2$), diploma ($n=8$), dan ijazah ($n=1$). Seterusnya, latar belakang pekerjaan peserta kajian pula tidak bekerja ($n=5$), bekerja sendiri ($n=6$), pekerja kilang ($n=3$), pelajar ($n=2$), dan lain-lain seperti bekerja sebagai polis, pengawal keselamatan, pengurus, tukang masak, 'barista', admin, 'retail', 'hotelier', dan perkhidmatan pelanggan (*customer service*) ($n=9$). Terdapat peserta kajian yang tinggal bersama keluarga ($n=13$), asrama ($n=2$), kawan-kawan ($n=7$), dan kekasih ($n=3$).

Hubungan interpersonal dengan ibu

Daripada 25 orang peserta kajian, seramai empat orang melaporkan tidak mempunyai ibu kerana telah meninggal dunia. Hasil laporan temubual bersama 21 orang peserta kajian yang lain mendapati bahawa ibu merupakan bentuk hubungan interpersonal yang penting yang wujud dalam kehidupan golongan pengkid, contohnya:

"kalau tak ada bapa tak apa, tapi mak kena ada".

Walaupun mereka tinggal berjauhan dan sibuk dengan aktiviti harian, mereka tetap meluangkan sedikit masa untuk berhubung dengan ibu mereka melalui telefon, misalnya:

"Walau sibuk macam mana sekalipun, mesti akan call dia. Kalau tak cakap sehari rasa tak best. Dialah segalanya untuk saya".

Kualiti hubungan mereka dengan ibu juga dilaporkan sebagai baik dan berpuas hati serta tidak mengalami sebarang konflik dengan ibu mereka. Hasil temubual mendapati hubungan dengan ibu adalah wujud dalam kehidupan golongan pengkid.

Hubungan interpersonal dengan bapa

Seramai tujuh orang peserta kajian melaporkan tidak mempunyai bapa kerana telah meninggal dunia. Hasil temubual bersama 18 orang peserta kajian yang mempunyai bapa mendapati bahawa bapa merupakan salah satu hubungan yang wujud dalam hubungan interpersonal mereka. Golongan pengkid secara umumnya didapati mempunyai kualiti hubungan yang baik dan berpuas hati dengan hubungan ini di mana mereka melaporkan:

"hubungan saya dengan dia macam kawan".

Walaupun ada dalam kalangan peserta kajian yang melaporkan mempunyai konflik dan tidak berhubung dengan bapa mereka, (misalnya:

“ dia ada ke tak ada ke sama je dan biasanya call sembang dengan mak je. Dengan bapa langsung tak. Selalunya lebih banyak mmm aaa je dengan dia bila sembang”.

Mereka masih melaporkan hubungan dengan bapa sebagai hubungan yang penting bagi mereka. Laporan ini jelas menunjukkan bahawa hubungan dengan bapa adalah wujud dalam hidup golongan pengkid.

Hubungan interpersonal dengan adik-beradik

Pada bahagian ini soalan dibahagikan kepada adik-beradik paling rapat dan tidak rapat. Bagi soalan kategori adik-beradik paling rapat, daripada 25 orang peserta kajian seramai 24 orang peserta yang bersamaan dengan 96% memberi respon. Mereka melaporkan kakak, adik lelaki, adik perempuan, abang, dan kembar sebagai adik-beradik yang paling rapat dengan mereka.

Seterusnya, seramai 12 orang daripada 25 orang peserta melaporkan bahawa mereka mempunyai adik-beradik yang mereka tidak rapat dalam keluarga. Mereka melaporkan abang dan adik perempuan sebagai adik-beradik yang paling mereka tidak rapat.

Hasil keputusan ini melaporkan bahawa golongan pengkid mempunyai salah seorang adik-beradik yang mereka rapat dalam keluarga, dan mereka selesa dengan hubungan tersebut. misalnya:

“kami memang rapat sangat-sangat dan memang tak de rahsia antara kami”.

Pada masa yang sama, terdapat juga golongan pengkid yang mempunyai hubungan yang kurang baik dengan adik-beradik mereka. Hal ini disebabkan golongan abang sering memberikan masalah kepada peserta kajian disebabkan penampilan mereka. Manakala sifat adik perempuan mereka juga menyebabkan golongan ini kurang selesa dengan mereka, contohnya:

adik perempuan saya gedik, dia selalu kutuk saya, tu yang saya tak suka dia”.

Secara ringkasnya, bolehlah dikatakan bahawa golongan pengkid mempunyai bentuk hubungan dengan adik-beradik walaupun mereka mempunyai kualiti hubungan yang kurang baik.

Antara respon peserta kajian terhadap hubungan interpersonal ini adalah:

“abang saya jenis yang suka buli saya. Sampai sekarang saya tak suka dia sebab dia nama saya diblacklist oleh Bank Negara”.

Hubungan interpersonal dengan lain-lain ahli keluarga

Pada bahagian ini, terdapat dua orang peserta kajian yang melaporkan mempunyai hubungan rapat dengan nenek dan emak saudara mereka. Mereka didapati sentiasa berhubungan dengan individu ini dan mempunyai kualiti hubungan yang baik. Selain itu, peserta kajian juga melaporkan bahawa mereka berkongsi beberapa perkara dengan individu ini kecuali perkara yang berkaitan personal mereka.

Secara umumnya, peserta kajian mempunyai lain-lain hubungan interpersonal yang rapat selain ahli keluarga sendiri. Hal ini jelas menunjukkan bahawa hubungan interpersonal golongan pengkid adalah pelbagai bentuk dan luas, misalnya:

“Mak cik saya tau je saya macam ni tapi tak pernah marah” dan “nenek tempat saya manja”.

Hubungan interpersonal dengan teman istimewa

Sebilangan besar daripada peserta kajian iaitu seramai 18 orang daripada 25 orang peserta kajian melaporkan mempunyai teman istimewa. Manakala tujuh orang lagi pula dilaporkan pernah mempunyai teman istimewa sebelum ini. Secara umumnya, ia menunjukkan satu bentuk hubungan sosial yang penting kepada peserta kajian kerana mereka melaporkan seperti:

“ dia memang penting untuk saya. Lagi penting dari diri saya. Dialah segalanya untuk saya”.

Apabila ditanya, peserta kajian melaporkan bahawa hubungan mereka diketahui dan diterima oleh keluarga pasangan mereka sahaja. Pada masa yang sama, mereka juga amat berpuas hati dengan hubungan ini dan ia merupakan hubungan yang penting kepada mereka misalnya:

“ saya sangat puas hati dengan dia. Kalau gaduh memang tak boleh lama, akan rasa rindu kat dia”.

Hubungan interpersonal dengan teman rapat

Hasil temubual mendapati seramai 17 orang daripada 25 orang peserta kajian melaporkan mempunyai teman rapat dalam hidup mereka. Mereka melaporkan bahawa teman rapat mereka terdiri daripada golongan perempuan, rakan pengkid, rakan lesbian (*femme*), dan lelaki. Hasil temubual ini menunjukkan bahawa mereka mempunyai kualiti hubungan yang baik dan berpuas hati dengan hubungan ini.

Perkara ini menunjukkan bahawa bentuk hubungan sosial ini adalah wujud dalam kehidupan golongan ini. Selain itu, ia lebih jelas lagi bahawa bentuk hubungan sosial ini adalah sangat penting kepada mereka dan ia terdiri daripada orientasi seksual yang pelbagai. Antara lain, peserta kajian melaporkan:

“dia memang baik”,

“kalau dia tak ada pun tak apa”,

“best kawan dengan dia”.

Hubungan interpersonal dengan teman sebilik/serumah

Pada bahagian ini, soalan dibahagikan kepada teman sebilik atau serumah yang paling rapat dan tidak rapat. Untuk bahagian teman sebilik atau serumah yang paling rapat, seramai tujuh orang daripada 25 orang peserta kajian telah memberikan respon. Perkara ini menunjukkan bahawa bentuk hubungan sosial ini adalah wujud dalam kehidupan golongan ini. Namun begitu, tidak ramai yang mempunyai bentuk hubungan ini dan mereka juga melaporkan kualiti hubungan yang baik dengan individu kategori ini.

Manakala bagi kategori teman sebilik atau serumah yang kurang baik pula, seramai tiga orang peserta memberi respon. Penelitian hasil keputusan ini mendapati tidak ramai peserta kajian yang mempunyai bentuk hubungan ini. Oleh itu, dapatlah diringkaskan bahawa, bentuk hubungan sosial ini adalah wujud tetapi tidak penting kepada peserta.

Antara maklum balas peserta kajian terhadap individu ini ialah:

“kami sama-sama layan cerita Korea. Memang seronok”,

“kami sama-sama suka kucing, jadi memang selalu sembang pasal kucing”,

“dia curi duit saya dan tuduh saya yang curi barang dia pula”.

Hubungan interpersonal dengan teman di tempat kerja/belajar

Pada bahagian ini, soalan dibahagikan kepada teman di tempat kerja atau belajar yang paling rapat dan tidak rapat. Bagi kategori teman di tempat kerja atau belajar yang baik, seramai lapan orang peserta kajian memberikan respon. Kualiti hubungan mereka dengan individu ini dilaporkan baik dan berpuas hati, contohnya:

“kalau time makan, dia akan bawa la apa-apa macam kek, roti, atau lain-lain. Tu yang seronok nak kawan dengan dia. dia memang baiklah. Kadang-kadang kami keluar jalan-jalan sama-sama”.

Keputusan ini menunjukkan bahawa hubungan sosial ini wujud dalam kehidupan golongan ini. Namun begitu, tidak ramai yang memilikinya.

Manakala bagi kategori teman di tempat kerja atau belajar yang kurang baik pula dilaporkan oleh seramai enam orang peserta. Mereka melaporkan rasa kurang berpuas hati dengan individu ini disebabkan pelbagai perkara yang diwujudkan oleh individu tersebut. Hal ini menjelaskan bahawa golongan pengkid mempunyai individu yang kurang memuaskan hati di tempat kerja atau belajar mereka kerana beberapa sebab. Namun begitu, ia bukanlah suatu hubungan sosial utama kepada mereka.

Hubungan interpersonal dengan pensyarah/majikan

Daripada 25 orang peserta, seramai 13 orang peserta kajian melaporkan mempunyai bentuk hubungan ini. Daripada 13 orang, tujuh orang peserta melaporkan mempunyai hubungan yang baik dengan majikan dan empat orang lagi dengan pensyarah. Mereka melaporkan mempunyai kualiti hubungan yang baik, dan berpuas hati dengan individu ini, misalnya:

“ dia selalu bagi nasihat, kalau keluar dengan dia, dia selalu nasihat suruh saya pakai tudung”

“dia memang sempoi sejak kenal dia”

Perkara ini menjelaskan bahawa golongan ini mempunyai bentuk hubungan sosial ini dalam hidup dan mereka tidak menghadkan pergaulan mereka.

Hubungan interpersonal dengan jiran

Pada bahagian ini terdapat dua orang peserta kajian yang memberi respon daripada keseluruhan peserta kajian. Didapati peserta lain tidak rapat dengan jiran mereka. Kedua-dua peserta melaporkan mereka mempunyai kualiti hubungan yang baik dengan jiran mereka.

Secara ringkasnya, hubungan interpersonal wujud dalam kehidupan golongan pengkid. Walaupun tidak ramai yang memiliki hubungan sosial ini, tetapi kualiti hubungan dengan individu kategori ini adalah baik dengan peserta yang memilikinya. Antara maklum balas daripada peserta kajian terhadap jiran mereka:

“Mak cik tu selalu tegur kalau jumpa. Biasanya sebelum saya balik ke KL, saya akan pesan kat dia suruh jagakan mak saya sekali”

Hubungan interpersonal dengan lain-lain individu yang baik dengan diri peserta kajian

Pada bahagian ini, seramai 15 orang daripada 25 orang peserta kajian telah menyenaraikan individu lain yang rapat dengan diri mereka. Individu-individu lain yang dilaporkan sebagai rapat dengan mereka adalah rakan seairan, sepupu lelaki, emak saudara, dan bekas kekasih. Manakala lain-lain peserta pula menyenaraikan anak buah perempuan, sepupu perempuan, ibu kekasih, kawan lelaki, dan kawan perempuan, sebagai individu yang baik dengan mereka, misalnya:

“ kalau masa raya, memang lepak dengan sepupu. Dia tau tentang saya dan dia selalu sindir juga tapi ok la”.

Keputusan ini jelas menunjukkan bahawa hubungan interpersonal golongan pengkid tidak hanya terhad kepada ahli keluarga, rakan-rakan atau pasangan istimewa sahaja. Malah mereka juga mempunyai kualiti hubungan yang baik dengan saudara-mara dan orang sekeliling yang lain. Selain itu, ia juga menjelaskan bahawa hubungan interpersonal golongan ini adalah luas dan pelbagai serta terdiri daripada individu yang mengamalkan pilihan orientasi seksual sesama jantina. Antara respon peserta kajian adalah seperti berikut:

“mak cik saya selalu call saya dan tanya khabar. Dia memang caring”

“bekas kekasih saya akan contact saya tanpa pengetahuan boyfriend dia sekarang. Dari dulu dia memang baik dengan saya”.

Perbincangan

Hasil dapatan kajian mendapati bahawa semua kategori hubungan interpersonal yang disenaraikan dalam soalan temubual semi struktur ada dilaporkan oleh peserta kajian. Bentuk hubungan interpersonal ini termasuklah ibu, bapa, adik-beradik, teman istimewa, teman rapat, teman sebilik atau serumah, teman sekerja atau tempat belajar, pensyarah atau majikan, dan jiran. Selain hubungan-hubungan tersebut, mereka juga dilaporkan mempunyai bentuk hubungan yang baik dengan beberapa individu lain seperti sepupu, bekas teman istimewa, emak saudara, dan sebagainya. Perkara ini jelas menunjukkan bahawa golongan pengkid dalam kajian ini serta berkemungkinan besar keseluruhan golongan pengkid di Malaysia bolehlah dikatakan mempunyai rangkaian sosial yang luas dan pelbagai. Dapatan kajian ini juga didapati adalah selaras dengan dapatan kajian terdahulu yang dijalankan oleh Grossman et al. (2000). Dalam kajian tersebut dilaporkan bahawa golongan pengkid secara umumnya mempunyai bentuk interpersonal yang luas iaitu terdiri daripada ahli keluarga, teman rapat, dan rakan komuniti.

Walau bagaimanapun individu-individu yang dilaporkan wujud dalam sistem rangkaian sosial golongan pengkid secara umumnya memainkan peranan yang unik dan berbeza antara satu sama lain. Hal ini menyebabkan golongan pengkid mengalami tahap kepuasan yang berbeza dalam hubungan tersebut. Misalnya, rakan sekerja dilaporkan membantu golongan ini dalam hal yang melibatkan tugas kerja sahaja. Manakala rakan setempat belajar pula membantu dalam perihal pelajaran dan tidak membantu dalam perkara lain. Selain itu, terdapat juga limitasi-limitasi tertentu yang ditetapkan dalam hubungan tersebut. Misalnya, kebanyakan golongan pengkid melaporkan bahawa mereka kurang selesa untuk berkongsi perihal keluarga dengan teman mereka kerana bagi mereka ia adalah personal dan tidak boleh berkongsi dengan semua orang. Selain itu, golongan ini juga menetapkan limitasi untuk tidak meminta bantuan kewangan daripada rakan-rakan tetapi mendapatkan bantuan ini daripada ahli keluarga dan teman istimewa mereka sahaja ketika menghadapi masalah kewangan.

Selain bentuk hubungan positif, golongan minoriti ini juga melaporkan mempunyai bentuk hubungan interpersonal yang kurang baik atau negatif dalam rangkaian sosial mereka. Misalnya, mereka mempunyai adik-beradik yang tidak rapat, teman serumah atau sebilik yang kurang baik, dan teman sekerja atau tempat belajar yang kurang baik dengan mereka. Secara

umumnya, golongan ini dikenalpasti kurang berpuas hati dalam hubungan dengan individu-individu tersebut disebabkan pelbagai perkara seperti sikap individu itu yang mementingkan diri sendiri, peserta kajian disalahkan atas kesalahan yang tidak berkaitan, dan sebagainya. Selain itu, individu-individu tersebut juga dilaporkan kurang memberikan sokongan sosial yang diperlukan oleh golongan pengkid dalam kajian ini.

Hasil kajian ini merumuskan bahawa golongan pengkid secara umumnya mengamalkan pergaulan yang terbuka tanpa menetapkan batasan untuk berhubung dengan rakan sehaluan sahaja. Sebagai buktinya, golongan ini melaporkan mempunyai bentuk hubungan yang baik dengan individu heteroseksual juga. Misalnya, terdapat segelintir peserta kajian yang melaporkan wanita heteroseksual dan lelaki sebagai teman rapat mereka. Perkara ini jelas menunjukkan bahawa golongan pengkid selesa dan tidak berdepan dengan sebarang masalah untuk bergaul dengan individu-individu yang mengamalkan orientasi seksual yang tradisional.

Mereka mempunyai hubungan interpersonal yang pelbagai kerana berpuas hati dalam penerimaan sokongan sosial yang pelbagai daripada hubungan mereka. Selain itu, golongan ini juga secara umumnya, selesa dengan identiti seksual mereka dan sokongan sosial yang diberikan kepada mereka.

Secara ringkasnya, golongan pengkid bergaul bebas dengan semua individu dan diterima oleh ahli keluarga tanpa mengira orientasi seksual mereka. Penerimaan golongan ini menunjukkan bahawa walaupun mereka mengamalkan gaya hidup yang berbeza, ia merupakan suatu bentuk hubungan yang merentasi perbezaan. Golongan ini juga menerima secara terbuka individu yang mengamalkan gaya seksual "tradisional" yang bersikap baik dengan mereka. Selain itu, hasil temubual mendapati bahawa golongan ini merupakan individu yang suka bergaul dan menambah ahli rangkaian sosial mereka. Sifat suka berkawan yang dimiliki oleh mereka menyebabkan golongan ini mempunyai bentuk hubungan interpersonal yang luas dan pelbagai. Di samping itu, penerimaan diri mereka sebagai pengkid oleh seseorang individu dalam rangkaian itu juga menyebabkan golongan ini menjadi rapat dan meneruskan hubungan yang baik serta menerima pelbagai bentuk sokongan daripada individu tersebut.

Secara umumnya, golongan pengkid berpuas hati dalam kebanyakan bentuk hubungan interpersonal yang dimiliki. Bentuk hubungan interpersonal yang memberikan sokongan sosial yang pelbagai, kurang memberikan konflik, dan menerima pilihan orientasi seksual mereka didapati memberikan tahap kepuasan yang maksimum kepada mereka seperti hubungan dengan teman rapat dan teman istimewa.

Dalam kajian yang dijalankan oleh Beeler, Rawls, Herdt, dan Cohler (1999) melaporkan keputusan yang sama dengan kajian ini, iaitu kualiti rangkaian sosial atau hubungan interpersonal merupakan salah satu perkara terpenting kepada kumpulan lesbian. Pada masa yang sama, golongan ini juga mengalami tahap kepuasan yang maksimum dalam hubungan dengan teman istimewa dan teman rapat mereka kerana menerima pelbagai bentuk sokongan daripada kedua-dua bentuk hubungan tersebut (Grossman et al., 2000). Sekaligus, ia menjadikan golongan ini berpendapat kedua-dua bentuk sokongan tersebut adalah bentuk hubungan terpenting kepada mereka. Namun begitu, golongan ini tidak mendapatkan sokongan kewangan daripada teman rapat tetapi mereka cenderung menerima sokongan ini daripada teman istimewa dan ahli keluarga mereka (Grossman et al., 2000).

Kajian ini memberi beberapa implikasi. Pertamanya, fungsi hubungan sosial yang pelbagai boleh menimbulkan lebih kepuasan dalam kalangan penerima. Kajian ini juga mencadangkan kepentingan ibu bapa untuk memainkan peranan yang lebih penting dalam kehidupan anak-anak mereka dan tidak membiarkan kawan rapat atau teman istimewa sebagai memainkan peranan yang lebih penting berbanding mereka.

Penutup

Perbincangan ini secara umumnya mencadangkan bahawa golongan pengkid dalam kajian ini mempunyai hubungan interpersonal yang luas dan pelbagai dalam kehidupan mereka. Secara umumnya, mereka berpuas hati dalam menjalin hubungan dengan individu yang menerima orientasi seksual mereka dan memberi sokongan yang diperlukan oleh golongan ini. Selain itu, golongan ini juga tidak menetapkan sebarang had dalam menjalin hubungan dengan seseorang individu termasuk dengan individu yang mengamalkan orientasi seksual yang bukan sesama jantina.

Walaupun bagaimanapun, kajian ini hanya melibatkan sampel yang kecil dan tidak mewakili semua kumpulan etnik dan budaya di Malaysia. Ianya juga menggunakan teknik temubual berstruktur. Jumlah sampel yang lebih besar dan mewakili semua kumpulan etnik dan budaya di Malaysia serta kaedah temubual mendalam mungkin boleh menghasilkan dapatan kajian yang menyeluruh dan mendalam. Kajian ini menunjukkan kepentingan untuk lebih banyak penyelidikan di Malaysia, khususnya dalam bidang psikologi sosial untuk memfokus kepada lebih banyak kumpulan terpinggir.

Penghargaan

Kajian ini merupakan sub-bahagian daripada satu penyelidikan sarjana yang lengkap. Penyelidikan ini juga dibiayai oleh geran *Postgraduate Research Grant Scheme* (PRGS), 1001/PSOSIAL/834079, Universiti Sains Malaysia.

Rujukan

- Baba, M. (1995). *Remaja lelaki dan perempuan homoseks – Di mana silapnya*. Kertas Kerja Prosiding Seminar Kebangsaan Gejala Sosial, Universiti Utara Malaysia.
- Beach, S. R. H., Katz, J., Kim, S., & Brody, G. H. (2003). Prospective effects of marital satisfaction on depressive symptoms in established marriages: A dyadic model. *Journal of Social and Personal Relationships*, 20, 355–371.
- Bearss, N. (2010). *Encyclopedia of cross-cultural school psychology*, 8, 465–471.
- Beeler, J. A., Rawls, T. D., Herdt, G., & Cohler, B. J. (1999). The needs of older lesbians and gay men in Chicago. *Journal of Gay and Lesbian Social Services*, 9(1), 31–49.
- Berscheid, E., & Reis, H. T. (1998). Attraction and close relationships. In D. T. Gilbert, S. T. Fiske, & G. Lindzey (Eds.), *The handbook of social psychology* (pp. 193–281). New York: McGraw-Hill.
- Bieber. (1969). Homosexuality. *American Journal of Nursing*, 69, 2637–2641.
- Diplacido, J. (1998). Minority stress among lesbians, gay men, and bisexuals. In Herek, G. M. (Ed), *Stigma and sexual orientation: Understanding prejudice against lesbians, gay men, and bisexuals* (pp138–159). Thousand Oaks, CA: Sage.
- Ettorre, E. M. (1980). *Lesbians, Women and Society*. London, Boston & Henley: Routledge & Kegan Paul Ltd.
- Fox, R. C. (1995). Bisexual identities. In D’Augelli, A. R. D., & Patterson, C. J. (Eds), *Lesbian, gay, and bisexual identities over the lifespan*. New York: Oxford University Press.
- Grossman, A. H., D’Augelli, A. R., & Hershberger, S. L. (2000). Social support networks and lesbian, gay, and bisexual adults 60 years of age and older. *Journal of Gerontology: Psychological Sciences*, 55, 171–179.
- Heider, F. (1958). *The psychology of interpersonal relations*: John Wiley & Sons, Inc.
- Hyde, J. S., & DeLamater, J. D. (2003). *Understanding human sexuality*. New York: McGraw-Hill Higher Education.
- Kartono, K. (1989). *Psikologi abnormal dan abnormalitas seksual*. CV Mandar Maju, Bandung , 9.

- Kasim, M., & Zain, A. N. M. (1995). *Profail aktiviti remaja lepak*. Kertas Kerja Prosiding Seminar Kebangsaan Gejala Sosial 1995.
- Kurdek, L. A. (2005). What do we know about gay and lesbian couples? *Current Directions In Psychological Sciences*, 14, 251-254.
- Myers, D. G., & Diener, E. (1995). Who is happy? *Psychological Science*, 6, 10-19.
- Nardi, P. M. (1999). *Gay men's friendships: Invincible communities*. Chicago: University of Chicago Press.
- Noor, A. B. M. (2004). *Fungsi psikologikal dan penerimaan sosial golongan transeksual di pusat pengajian tinggi*. Kertas kerja dibentangkan dalam Prosiding Seminar Kebangsaan Ke-3 Psikologi Dan Masyarakat - Gejala Sosial Dalam Masyarakat, Pusat Latihan KWSP Bangi (ESSET).
- Peplau, L. A., & Cochran, S. D. (1990). A relational perspective on homosexuality. In D. P McWhirter, S.A. Sanders, & J. M. Reinisch (Eds.), *Homosexuality/heterosexuality: Concepts of sexual orientation* (pp. 321-349). New York: Oxford University Press.
- Rosario, M., Schrimshaw, E. W., Hunter, J., & Levy-Warren, A. (2009). The coming-out process of young lesbian and bisexual women: Are there butch/femme differences in sexual identity development? *Archives of Sexual Behaviour*, 38, 34-49.
- Salovey, P., Rothman, A. J., & Rodin, J. (1998). Social psychology and health behavior. In D. T. Gilbert, S. T. Fiske, & G. Lindzey (Eds.), *The handbook of social psychology* (pp. 633-683). New York: McGraw-Hill.
- Smith, S. A., & Serovich, J. M. (2008). *Encyclopedia of Women's Health*, 13, 362-364.
- Weinberg, T. S. (1994). Research in sadomasochism: A review of sociological and social psychological literature. *Annual Review of Sex Research*, 5, 257-279.
- Wolf, T. J. (1985). Marriages of bisexual men. In Klein, F., & Wolf, T. J. (Eds), *Bisexualities: Theory and research*. New York: Haworth.